



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ ԹԻՎ 1 ԴԱՏԱԿԱՆ ԿԱԶՄԻ  
Ո Ր Ո Շ ՈՒ Մ Ը**

---

**ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՀԱՐՑԻ ՎԵՐԱԲԵՐՑԱԼ**

Քաղ. Երևան

4 նոյեմբերի 2010թ.

Հայաստանի Հանրապետության սահմանադրական դատարանի  
թիվ 1 դատական կազմը՝

Նախագահությամբ՝ Վ. Հովհաննիսյանի  
Անդամակցությամբ՝ Վ. Պողոսյանի  
Կ. Բալայանի

Ուսումնասիրելով քաղաքացի Արման Մաթեոսյանի անհատական դիմումով  
գործը քննության ընդունելու մասին հարցը,

**ՊԱՐԶԵՑ.**

Համաձայն ՀՀ Սահմանադրության 101-րդ հոդվածի 1-ին մասի 6-րդ կետի՝  
քաղաքացի Արման Մաթեոսյանը 25.10.2010թ. դիմել է ՀՀ սահմանադրական դատարան՝  
խնդրելով քննության առնել եւ որոշել ՀՀ քաղաքացիական դատավարության  
օրենսգրքի 231-րդ եւ 234-րդ հոդվածների համապատասխանությունը ՀՀ  
Սահմանադրությանը, մասնավորապես՝ վերջինիս 3-րդ, 18-րդ, 19-րդ եւ 34-րդ  
հոդվածների պահանջներին.

Դիմողի կարծիքով՝ Վճռաբեկ դատարանի կողմից ՀՀ քաղաքացիական դատավարության օրենսգրքի վիճարկվող դրույթների կիրառման արդյունքում ոտնահարվել է Սահմանադրությամբ երաշխավորված՝ անկախ եւ անկողմնակալ դատարանի կողմից հավասարության պայմաններում դատաքննության իր իրավունքը:

1. Վիճարկվող 231-րդ հոդվածը (նախկին խմբագրությամբ՝ 230-րդ հոդված) կրում է «Վճռաբեկ բողոքի բովանդակությունը» վերտառությունը եւ կարգավորում է վճռաբեկ բողոքի բովանդակությանն առնչվող իրավահարաբերությունները: Դատական կազմն արձանագրում է, որ օրենսգրքի 231-րդ հոդվածի 1-ին մասն ամբողջությամբ քննության առարկա է հանդիսացել սահմանադրական դատարանում եւ վիճարկվող դրույթի սահմանադրականության հարցի վերաբերյալ առկա է ՄԴՈ-690 որոշումը, որով այդ դրույթը ճանաչվել է ՀՀ Սահմանադրությանը համապատասխանող: Հետագայում վիճարկվող դրույթն էական փոփոխություններ չի կրել («կիրառվել» բառից հետո ավելացել է «եւ դրանց հիմնավորումները» արտահայտությունը):

ՄԴՈ-765 որոշմամբ 231-րդ հոդվածի 2-րդ մասը ճանաչվել է Սահմանադրությանը հակասող եւ անվավեր:

«Հայաստանի Հանրապետության քաղաքացիական դատավարության օրենսգրքում փոփոխություններ եւ լրացումներ կատարելու մասին» ՀՕ-233 օրենքի 16-րդ հոդվածով օրենսգրքի 231-րդ հոդվածի 2-րդ մասը շարադրվել է հետևյալ խմբագրությամբ. «Վճռաբեկ բողոքն ստորագրում է բողոք ներկայացնող անձը կամ նրա ներկայացուցիչը, գլխավոր դատախազը կամ նրա տեղակալը: Եթե վճռաբեկ բողոքը ներկայացվում է ներկայացուցչի միջոցով, ապա բողոքին կցվում է ներկայացուցչի՝ սույն օրենսգրքով սահմանված կարգով ձևակերպված լիազորագիրը»:

Այսպիսով, դատական կազմի կարծիքով՝ դիմումի հիման վրա գործի քննությունը՝ 231-րդ հոդվածի մասով քննության ընդունման ենթակա չէ, քանի, որ այդ հոդվածի առնչությամբ առկա են սահմանադրական դատարանի ՄԴՈ-690, ՄԴՈ-765 որոշումները («Սահմանադրական դատարանի մասին» ՀՀ օրենքի 32-րդ հոդվածի 3-րդ կետ):

2. Վիճարկվող 234-րդ հոդվածի (նախկին խմբագրությամբ՝ 231.2) վերաբերյալ առկա է ՀՀ սահմանադրական դատարանի ՄԴՈ-690 որոշումը, որով ՀՀ քաղաքացիական դատավարության օրենսգրքի 231.2-րդ հոդվածի (ներկայիս

խմբագրմամբ՝ 234-րդ հոդված) բոլոր դրույթները քննության առարկա են հանդիսացել եւ ճանաչվել ՀՀ Սահմանադրությանը համապատասխանող: Հետագայում այս հոդվածը փոփոխության չի ենթարկվել:

Այսպիսով, դատական կազմի կարծիքով՝ դիմումի հիման վրա գործի քննությունը՝ 234-րդ հոդվածի մասով քննության ընդունման ենթակա չէ այն հիմնավորմամբ, որ այդ հոդվածի առնչությամբ առկա է ՀՀ սահմանադրական դատարանի ՄԴՈ-690 որոշումը («Սահմանադրական դատարանի մասին» ՀՀ օրենքի 32-րդ հոդվածի 3-րդ կետ):

Ելնելով վերոգրյալից եւ ղեկավարվելով «Սահմանադրական դատարանի մասին» ՀՀ օրենքի 31-րդ հոդվածով, 32-րդ հոդվածի 6-րդ կետով, 69-րդ հոդվածի 7-րդ մասով, ՀՀ սահմանադրական դատարանի կանոնակարգի 26-րդ հոդվածով՝ ՀՀ սահմանադրական դատարանի թիվ 1 դատական կազմը

ՈՐՈՇԵՑ.

Քաղաքացի Արման Մաթեոսյանի անհատական դիմումով գործի քննությունը մերժել:

Նախագահող

Անդամներ

